

Diskursu MOP Iha Serimonia Isar Bandéira Nasionál Inísiu Fulan- Agostu

Dili, Segunda, 06 Agostu 2018

Ministru Transporte no Komunikasaun,

Ha'u-nia Vise Ministru,

Sekretáriu Jerál,

Diretór Jerál sira,

Diretór Nasionál Sira,

Xefe-Departamentu sira,

Funsionáriu no tékniku sira tomak,

Assesór sira,

Bomdia ba ita-boot sira hotu.

Ha'u hakarak fahe ha'u-nia hanoin kona-ba ita-nia kultura servisu liga ho serimonia isar bandeira ida-ne'e. Hanesan ohin ita hala'o ita-nia serimonia isar bandeira ida-ne'e fó hanoin fali ba ita kona-ba sakrifísiu, luta ne'ebé ita-nia eroi no mártires sira halo ona ba ita-nia nasaun. Ha'u impresta sira seluk nia lia-faun dehan, ita hanesan jersaun kontinudadór mai ita hamutuk, ita lori espíritu ida-ne'e ba luta liberta ita-nia povu husi kí'ak no mukit.

Ha'u hakarak fahe ha'u-nia hanoin kona-ba ida-ne'e, hanesan horbainhirak ha'u hatete ona, ita-nia vizaun mak ida-ne'e, loron ida ita iha infra-estrutura ne'ebé mak kualidade, integradu, seguru no sustentável, ne'ebé refleta duni povu Timor-Leste nian, sosiu ekonómiku, sosiu kulturál no nia prosesu konstrusaun ne'e ita fó servisu ba ema barak, hasa'e sira-nia kualidade moris,

fó asesu ba sira dezemvolvimentu nasionál no facilidade infra-estrutura rural ne'e ba sira.

Ita-nia misaun mak saida? Ha'u hanoin, ha'u ho ita-boot sira, ita hamutuk iha ne'e, ita hakarak hadi'a prestasaun servisu ministériu ida-ne'e nian, mak hanesan:

- * Prestasaun iha fornesimentu servisu
- * Implementasaun projeitu
- * Jestaun orsamentu no
- * Kontabilidade

Ha'u fiar katak ita-boot sira komprometidu loos, iha espíritu para ita hamutuk lori vizaun no misaun sira ne'e ba oin. Ha'u mós fiar katak, ita tenke iha kultura servisu ne'ebé mak boot liu, porizemplu husi ministru to'o iha hamoos na'in sira, ha'u mensiona nafatin ita-boot sira, ita tenke iha espíritu kultura ida ne'ebé iha servisu sira, hanesan:

- * Ha'u moe, kuandu ha'u tau ha'u-nia interese privadu liu fali interese estadu nian.
- * Ha'u moe kuandu ha'u trata ministériu ida-ne'e hanesan ha'u-nia kompañia.
- * Ha'u moe kuandu ha'u mai tarde tiha ona, invece de ha'u fila tarde para selu oras ida ne'ebé ha'u mai tarde, ha'u tarde tiha ona, ha'u sei konta história, ha'u gasta ha'u-nia tempu servisu para halo de'it buat sira seluk ne'ebé favorese ba ha'u-nia interese privadu.
- * Ha'u moe kuandu ha'u failla atu kontribui em nome de interese estadu, bainhira ha'u-nia lideransa presiza ha'u-nia kontribuisaun. Ha'u hatene ha'u bele ajuda hela, ha'u dehan lae tanba ha'u-nia sentidu, ha'u-nia dignidade hanesan pesoál aas liu interese estadu.
- * Ha'u moe tanba ha'u la konsege tau sentidu estadu aas liu ha'u-nia dignidade, hanesan maun Lasama (Saudozu, Fernando Lasama de Araujo) dehan, "Ha'u-nia dignidade la boot ka la aas liu dignidade nasaun nian".

Ha'ú lee kona, ita-boot sira hatene mundu polítiku, Sr. John F. Kennedy, bainhira toma posse iha loron 20 fulan-Janéiru 1961, hanesan Prezidente Estados Unidos Amerika (EUA) nian ba dala-tolu-nulu-resin-lima (35), hatete, 'keta husu nasaun atu halo saida ba ita, maibé husu ba ita-nia-an saida mak ita halo ba nasaun' (***Ask not what your country can do for you; ask what you can do for your country***).

Husu ba O nia-an, ita ida-idak nia-an, inklui ha'ú ministru, ha'ú-nia maluk ministru sira iha governasaun ida-ne'e, saida mak ita bele halo ba nasaun ida-ne'e, labele husu ba nasaun saida mak nasaun bele halo ba ita-boot sira, ida-ne'e la'os ita-boot sira de'it, ha'ú de'it, hanesan ekipa, hanesan timoroan ne'ebé mak hetan benefísiu husi eroi no mártires sira-nia luta ba ukun rasikan, ha'ú sente ha'ú iha obrigasaun atu kontinua buat ida-ne'e.

Ha'ú hatene katak la kleur tan ita tama iha faze ida importante, faze importante ne'e mak proposta orsamentu, parese ohin (06 Agostu 2018) orsamentu tranzitóriu 2018 nian ba ona Parlamentu Nasionál.

Iha Konsellu Ministru semana kotuk aprova ona kalendáriu ba planu asaun 2019 nian, ha'ú husu ita-boot sira-nia kontribuisaun tomak, ha'ú fiar katak ita-boot sira komprometidu, ita-boot sira iha vokasaun, espíritu, tane interese estadu aas liu duke interese pesoál.

Ha'ú fiar katak hamutuk ita sei halo planu ida di'ak, tau orsamentu ida di'ak para tinan lima (5) mai ne'e ita bele halo netik buat ida ba nasaun doben ida-ne'e.

Ha'ú dalaruma sai ba rai-liur, ha'ú kuandu haree ema-nia aeroportu di'ak, haree ema-nia dalan di'ak, ema-nia ordenamentu sidade di'ak, ema disipliña, ema-nia konsiénsia aas liu, ha'ú hanoin katak, bainhira mak ha'ú-nia nasaun sai hanesan ne'e, ha'ú mós hakarak haree nasaun ida ho beleza ne'ebé di'ak. Nia beleza lakon de'it, nia pontensialidade ne'e lakon de'it, tanba de'it ita falta de jestaun ida di'ak. Ha'ú-nia mehi, ita hotu-hotu nia mehi hakarak ita-nia nasaun ne'e avansa hanesan nasaun sira seluk.

Ikus liu, ha'ú kongratula ita-boot sira, ba sira ne'ebé organiza serimonia isar bandeira ne'e, ita-nia kantora sira (Ita basa liman ba sira...) Ha'ú hein katak ita-boot sira-nia partisipasaun la'os de'it iha isar bandeira ne'e, maibé partisipasaun iha planu asaun sira ba ita-nia servisu, no mós apoiu ba prosesu dezvoltimentu ba nasaun doben ida-ne'e.

Obrigado barak ba ita-boot sira-nia atensaun...!

Fatin: Edifisiu Ministeriu Transporte Komunikasaun (MTK), Eis Merkadu-Lama.

Arq. Salvador Eugénio Soares dos Reis Pires

Ministru Obras Públikas

#Media_MOP